

# Hotuba ya makadirio ya mapato na matumizi

## Ya ofisi ya makamu wa kwanza wa rais

### Kwa mwaka wa fedha

2014/2015

#### UTANGULIZI

- Mheshimiwa Spika**, kwa ruhusa yako naomba kutoa hoja kwamba Baraza lako tukufu sasa likae kama Kamati ya matumizi ili liweze kupokea, kuzingatia, kujadili, kuchangia na hatimae liweze kuidhinisha Makadirio ya Mapato na Matumizi ya Ofisi ya Makamu wa Kwanza wa Rais kwa mwaka wa Fedha 2014/2015.
- Mheshimiwa Spika**, sina budi kumshukuru Mwenyezi Mungu kwa kutujaalia uzima wa afya na kutuwezesha kukutana katika Baraza hili kwa lengo la kujadili mambo muhimu kwa maendeleo ya Taifa letu.
- Mheshimiwa Spika**, napenda kutoa shukurani za dhati kwa Rais wa Zanzibar na Mwenyekiti wa Baraza la Mapinduzi Mheshimiwa Dk. Ali Mohamed Shein, kwa hekima na busara zake za kuiongoza nchi yetu katika hali ya usalama na amani. Napenda pia kutoa shukurani zangu za dhati kwa Makamu wa Kwanza wa Rais wa Zanzibar, Mheshimiwa Maalim Seif Sharif Hamad kwa kuweza kusimamia vyema majukumu yake. Aidha, napenda kumshukuru Makamu wa Pili wa Rais, Mheshimiwa Balozzi Seif Ali Iddi kwa usimamizi na maelekezo yake ya kiutendaji wa shughuli za Serikali.
- Mheshimiwa Spika**, nachukua fursa hii pia kutoa shukurani zangu za dhati kwako wewe binafsi na wasaidizi wako kwa kuliongoza Baraza hili kwa umakini mkubwa, jambo ambalo linapelekea utulivu na ufanisi wa Baraza hili katika kutekeleza majukumu yake.
- Mheshimiwa Spika**, napenda pia kuishukuru kwa dhati Kamati ya kudumu ya Baraza la Wawakilishi ya Kusimamia Ofisi za Viongozi

Wakuu wa Kitaifa inayoongozwa na Mheshimiwa Hamza Hassan Juma, Mwakilishi wa Wananchi wa Jimbo la Kwamtipura, kwa mashirikiano na miongozo wanayotupatia. Pia naishukuru kwa dhati Kamati ya Kudumu ya Baraza la Wawakilishi ya Kusimamia Hesabu za Serikali chini ya Mwenyekiti wake Mheshimiwa Omar Ali Shehe, mwakilishi wa Wananchi wa Jimbo la Chake Chake kwa mashirikiano mema na Ofisi yetu.

6. **Mheshimiwa Spika**, napenda kuwashukuru Waheshimiwa Wajumbe wenzangu wa Baraza la Wawakilishi, kwa kunipa ushirikiano na ushauri tukiwa ndani na nje ya Baraza, ushirikiano wao huo umechangia kwa kiasi kikubwa kuniwezesha kutekeleza majukumu yangu kwa uadilifu na ufanisi kadri Mwenyezi Mungu alivyonijaalia.

## **MALENGO MAKUU YA OFISI YA MAKAMU WA KWANZA WA RAIS**

7. **Mheshimiwa Spika**, Ofisi ya Makamu wa Kwanza wa Rais ina jukumu la kuratibu masuala ya Mazingira na Mabadiliko ya tabianchi, Watu wenye Ulemavu, Udhhibiti wa dawa za kulevya na muitiko wa kitaifa wa kupambana na UKIMWI. Katika kutimiza jukumu hili, Ofisi ya Makamu wa Kwanza wa Rais imekuwa na malengo makuu yafuatayo:
  1. Kuratibu na kusimamia shughuli za Makamu wa Kwanza wa Rais
  2. Kuratibu Sera na Utafiti unaohusiana na maeneo ya majukumu ya OMKR.
  3. Kuimarisha mazingira ya kazi na maslahi ya wafanyakazi.
  4. Kusimamia mabadiliko ya tabiachi
  5. Kuimarisha usimamizi wa mazingira na matumizi endelevu ya maliasili.
  6. Kuimarisha na kutetea uzingatiaji wa haki na fursa sawa kwa Watu wenye Ulemavu ndani ya jamii.
  7. Kuratibu na kudhibiti usafirishaji, uingizwaji, matumizi na biashara haramu ya dawa za kulevya.
  8. Kuratibu muitiko wa kitaifa wa kupambana na UKIMWI.
8. **Mheshimiwa Spika**, Ofisi ya Makamu wa Kwanza wa Rais inatekeleza majukumu yake kupitia Taasisi zifuatazo:-

1. Ofisi ya Faragha
2. Idara ya Mipango, Sera na Utafiti
3. Idara ya Uendeshaji na Utumishi
4. Idara ya Mazingira
5. Idara ya Watu wenye Ulemavu
6. Ofisi ya Makamu wa Kwanza wa Rais Pemba
7. Tume ya Kuratibu na Udhhibiti wa Dawa za Kulevywa
8. Tume ya UKIMWI.

## **UTEKELEZAJI WA MALENGO YA OFISI YA MAKAMU WA KWANZA WA RAIS KWA MWAKA 2013/14**

### **OFISI YA FARAGHA**

- 9. Mheshimiwa Spika,** Ofisi ya Faragha ina jukumu ya kutoa huduma na kuratibu shughuli zote zinazofanywa na Makamu wa Kwanza wa Rais.

Kwa mwaka wa fedha 2013/14 Ofisi ya Faragha ilipanga kutekeleza malengo yafuatayo:

1. Kusimamia na kuratibu shughuli zote za Makamu wa Kwanza wa Rais
2. Kuimarisha utoaji wa huduma kwa Makamu wa Kwanza wa Rais
3. Kuimarisha mazingira ya kazi katika kuleta ufanisi

- 10. Mheshimiwa Spika,** hadi kufikia Machi 2014, Ofisi ya Faragha imeweza kutekeleza yafuatayo katika malengo iliyopanga:

- 11. Mheshimiwa Spika,** shughuli mbalimbali za Makamu wa Kwanza wa Rais zimeratibiwa ikiwa ni pamoja na kuwasaidia fedha taslim wananchi, jumuiya na vikundi 25, madrasa na miskiti 13 na wananchi 62 (Wanawake 28, Wanaume 34). Vilevile wageni kutoka nje ya nchi na wananchi kadhaa wa Unguja na Pemba walipata fursa ya kuonana na Makamu kwa lengo la kupatiwa ushauri na maelekezo juu ya mambo mbalimbali yanayowakabili.

- 12. Mheshimiwa Spika,** Jumla ya Kalenda 800 za mwaka 2014 zimechapishwa na kusambazwa kwa wadau mbalimbali. Mkutano mmoja wa mahojiano na waandishi wa habari umefanyika na kuelezea utekelezaji

wa majukumu ya OMKR pamoja na kuzungumzia maendeleo ya ujumla ya Zanzibar. Aidha, Vipindi maalum 5 vya Makamu wa Kwanza wa Rais vimetayarishwa kati ya hivyo 1 ni maalumu kwa ajili ya maadhimisho ya miaka 50 ya Mapinduzi ya Zanzibar, vile vile makala 6 zinazohusiana na masuala ya mazingira, siasa, uchumi zimetayarishwa na kuchapishwa katika gazeti la Zanzibar leo. Ziara mbalimbali za kikazi ndani ya nchi zilifanyika na ripoti za ziara hizo zimewasilishwa sehemu husika kwa ajili ya kufanyiwa kazi.

- 13. Mheshimiwa Spika,** Ofisi ya Faragha kwa mwaka wa Fedha 2013/14 imekadiria kutumia TZS 515,150,000/= kwa kuendeshea kazi. Hadi kufikia Machi, 2014 ilikwisha kuingiziwa TZS 133,846,075/= sawa na asilimia 26 (Angalia kiambatanisho namba 1)

#### **IDARA YA MIPANGO, SERA NA UTAFITI**

- 14. Mheshimiwa Spika,** Idara hii ina jukumu la kuandaa na kusimamia utekelezaji wa sera na mipango ya maendeleo; kutunza takwimu; kuratibu shughuli za utafiti pamoja na kufuatilia na kutathmini utekelezaji kwa taasisi zote zilizo chini ya Ofisi ya Makamu wa Kwanza wa Rais

Kwa mwaka wa fedha 2013/2014 Idara ya Mipango, Sera na Utafiti ilipanga kutekeleza malengo yafuatayo:

1. Kujengo uwezo wa watendaji na kufanya tafiti mbili kwa mujibu wa mpango mkuu wa utafiti wa Ofisi ya Makamu wa Kwanza wa Rais unavyoelekeza.
  2. Kusimamia na kutekeleza mambo mtambuka yanayosimamiwa na OMKR.
  3. Kuratibu, kusimamia, na kutekeleza mipango ya kazi na bajeti ya OMKR.
  4. Kuimarisha mazingira ya kazi na kuwajengea uwezo wafanyakazi.
- 15. Mheshimiwa Spika,** hadi kufikia Machi 2014 Idara ya Mipango, Sera na Utafiti imeweza kutekeleza yafuatayo katika malengo iliyopanga:
- 16. Mheshimiwa Spika,** utafiti wa kubaini upatikanaji wa huduma kwa Watu wenye Ulemavu zikiwemo huduma za Afya, sheria na elimu umefanyika.

Vile vile utafiti uliangalia miundombinu iliopo kwa watu wenye ulemavu na masuala ya fursa za uwezesaji na ajira. Matokeo ya utafiti huo yametumika katika kuandaa Sera ya Maendeleo ya Watu wenye Ulemavu.

17. **Mheshimiwa Spika**, OMKR imekamilisha rasimu ya kwanza ya Sera ya Maendeleo ya Watu wenye Ulemavu. Rasimu hiyo iliandaliwa kwa kuwashirikisha wadau kutoka sekta za binafsi, za Serikali na watu mbali mbali miongoni mwao wakiwemo watu wenye ulemavu kutoka Unguja na Pemba. Kukamilika kwa Sera hii kutaiwezesha OMKR pamoja na wadau wengine kusimamia vyema na kutetea haki na fursa kwa watu wenye ulemavu.
18. **Mheshimiwa Spika**, taarifa mbali mbali za utekelezaji za robo mwaka na za mwaka zimeandaliwa na kuwasilishwa sehemu husika ikiwemo Tume ya Mipango, OMPR, Wizara ya Fedha na taasisi nyengine kila inapohitajika.

## **UTEKELEZAJI WA MIRADI YA MAENDELEO**

19. **Mheshimiwa Spika**, katika mwaka 2013/2014 Idara ya Mipango, Sera na Utafiti iliratibu na kutekeleza miradi 2 ya maendeleo kwa fedha za Serikali na miradi 2 kwa fedha za Wadau wa Maendeleo kama ifuatayo:

1. **Mradi wa Elimu ya Mazingira**

20. **Mheshimiwa Spika**, Mradi huu unatekelezwa kwa fedha za SMZ, katika kipindi cha mwaka wa fedha 2013/14 mradi huu umetekeleza yafuatayo:

- Semina 2 kwa shehia 10 (6 Unguja na 4 Pemba) na vikundi 10 vya polisi jamii kutoka kila shehia zimefanyika.
- Vipindi vinne vya Radio vya Maliasili zisizorejesheka, mifuko ya plasitiki, mabadiliko ya tabianchi na usimamizi wa taka viliandaliwa na kurushwa hewani kupitia ZBC na Zenji FM Radio.
- Slogan mbili za TV za Maliasili zisizorejesheka na mifuko ya plasitiki zimerushwa hewani pamoja na kununua vifaa vya usafi kwa ajili ya kampeni za Usafi

## **2. Mradi wa Ujenzi wa Kituo cha Tiba na Marekebisho ya Tabia kwa Watumiaji wa Dawa za Kulevya**

- 21. Mheshimiwa Spika,** mradi huu nao unatekelezwa kwa fedha za SMZ. Katika kipindi cha utekelezaji cha 2013/14, mradi huu ulipangiwa kujenga uzio ili kulizuia eneo hilo na uvamizi. Kazi ya ujenzi wa uzio kwa ajili ya kituo hicho umeanza huko katika eneo la Kidimni. Kabla ya kuanza kwa kazi hio, OMKR ilifanya hatua zote za taratibu za manunuzi kama sheria inavyoelekeza.

## **3. Mradi wa usimamizi wa Mazingira na Mabadiliko ya Tabianchi**

- 22. Mheshimiwa Spika,** mradi huu unatekelezwa kwa fedha za Wadau wa Maendeleo (UNDP) kupitia program ya UNDAP. Mradi huu unatekelezwa kupitia malengo saba ambapo malengo manne kati ya hayo yanatekelezwa na Ofisi ya Makamu wa Kwanza wa Rais. Malengo hayo ni:

- i. Kuhakikisha masuala ya mazingira na mabadiliko ya tabianchi yanaingizwa katika mipango ya maendeleo ikiwa ni sehemu ya utekelezaji wa MKUZA II.
- ii. Kutayarisha Mkakati wa Zanzibar wa Kukabiliana na Mabadiliko ya tabianchi na kusaidia utekelezaji wake.
- iii. Kuimarisha muundo wa kitaasisi kwa ajili ya kusimamia masuala ya mabadiliko ya tabianchi.
- iv. Kukuza kiwango cha upatikanaji wa taarifa na uwelewa juu ya athari za mabadiliko na mikakati ya kukabiliana nayo miongoni mwa jamii na taasisi za Serikali.

Malengo mengine matatu ya mradi huu yanatekelezwa kupitia Wizara ya fedha, Wizara ya Kilimo na Maliasili na Wizara ya Ardhi, Makaazi, Maji na Nishati. Aidha, jumuiya ya CODECOZ nayo inashiriki katika kutekeleza mradi huu kupitia lengo moja la kukuza kiwango cha upatikanaji wa taarifa na uelewa juu ya athari za mabadiliko na mikakati ya kukabiliana nayo miongoni mwa jamii na Taasisi za Serikali.

- 23. Mheshimiwa Spika,** kupitia malengo manne ya mradi, OMKR imetekeleza yafuatavyo:

- Nakala 500 za muongozo wa uzingatiaji wa masuala ya mazingira na mabadiliko ya tabiachi zimeandaliwa na kuchapishwa pamoja na kuwafundisha Wakurugenzi wa Mipango, Sera na Utafiti, Maofisa wakuu wa mipango wa Wizara zote pamoja na wawakilishi kutoka Jumuiya za Kiraia
- Nakala 500 za muongozo wa kufanyia upembuzi (*screening*) miradi na mipango ya sekta zimechapishwa. Muongozo huo utatumika ili kuhakikisha masuala ya mabadiliko ya tabianchi yanazingatiwa kwenye mipango na miradi mbali mbali ya maendeleo.
- Mkakati wa Mabadiliko ya tabianchi umeandaliwa na tayari umepitishwa na Baraza la Mapinduzi. Mkakati huo unatoa miongozo ya namna ya kuweza kuhimili na kujikinga na athari za mabadiliko ya tabianchi katika maeneo mbali mbali.
- Muongozo wa kutoa mafunzo/elimu juu ya mabadiliko ya tabianchi umetayarishwa, muongozo huo utatumika katika kuwafundishia jamii na kuhakikisha kwamba wamepata taarifa sahihi zinazohusiana na mabadiliko ya tabianchi
- Mkakati wa Mawasiliano na Utetezi wa mabadiliko ya tabianchi umeandaliwa, mkakati huu umetoa muelekeo wa taarifa zinazohitajika na wadau mbali mbali na namna ya kuziwasilisha taarifa hizo kwa wadau katika ngazi tofauti.

#### **4. Mradi wa kujenga uwezo**

- 24. Mheshimiwa Spika**, mradi huu unatekelezwa kwa fedha za Wadau wa Maendeleo na unaratibiwa na Tume ya Mipango. Ofisi ya Makamu wa Kwanza wa Rais kupitia mradi huu kwa mwaka wa fedha 2013/14 ilipanga kutayarisha mfumo wa Ufuatiliaji na Tathmini. Kutokana na kuchelewa kuingia kwa fedha za utekelezaji, hadi kufikia Machi, Ofisi ilianza taratibu za manunuzi ili kuweza kumpata mtaalam wa kufanya kazi hiyo kama inavyoelekezwa katika sheria ya manunuzi. Mtaalamu huyo tayari amepatikana na ameanza kazi katika awamu ya kwanza ambayo inatarajiwa kukamilika mwezi wa Agosti.
- 25. Mheshimiwa Spika**, Idara ya Mipango, Sera na Utafiti kwa mwaka wa fedha 2013/2014 ilikadiriwa kutumia TZS  
160,065,000/- kwa kuendeshea kazi na TZS 150,000,000/- kwa ajili ya



utekelezaji wa miradi ya maendeleo kwa fedha za Serikali. Hadi kufikia Machi 2014 Idara ilikwisha ingiziwa TZS 43,587,483/= sawa na asilimia 27 kwa kuendeshea kazi na TZS 120,000,000/sawa na asilimia 80 kwa kazi za maendeleo. (Rejea Kiambatanisho namba 1)

## **IDARA YA UENDESHAJI NA UTUMISHI**

**26. Mheshimiwa Spika,** Idara hii ina jukumu la kusimamia shughuli za kila siku za uendeshaji na utumishi zikiwemo sheria na kanuni za utumishi, mafunzo, maslahi na maendeleo ya wafanyakazi.

Kwa mwaka wa fedha 2013/2014, Idara ilipanga kutekeleza yafuatayo:

1. Kuimarisha mazingira ya utendaji kazi.
2. Kukuza na kuimarisha mawasiliano ya habari.
3. Kuwajengea uwezo wafanyakazi na kuwapatia maslahi.
4. Kusimamia utaratibu wa matumizi ya fedha kwa mujibu wa sheria na kanuni za fedha zilizopo.

**27. Mheshimiwa Spika,** hadi kufikia Machi 2014 Idara imeweza kutekeleza yafuatayo katika mambo iliyopanga:

**28. Mheshimiwa Spika,** vifaa mbali mbali kwa matumizi ya ofisi na vitendea kazi, kama vile vifaa vya kuandikia, vifaa vya usafi na kompyuta, mafuta na vilainishi, malipo ya umeme, mtandao na huduma nyenginezo kwa kuimarisha mazingira ya utendaji kazi zimefanyika. Safari 18 za ndani (PBA, DAR, DOM) za kikazi na 7 za nje (Marekani, Poland, na Mauritius, Sychelles, Afrika ya Kusini, Malawi, Austria) zimegharamiwa. Safari hizi zimeongeza mahusiano mema na washirika wa maendeleo

**29. Mheshimiwa Spika,** programu 5 na makala 2 zenye maudhui mbali mbali ziliandaliwa na kutolewa kupitia vyombo mbali mbali vya habari. Lengo la programu hizi ni kutoa taarifa kwa wananchi kuhusiana na mambo yanayotekelezwa kupitia OMKR. Miongoni mwa programu ziliorushwa hewani ni filamu ya maadhimisho ya miaka 50 ya Mapinduzi ya Zanzibar inayohusu majukumu, mafanikio, changamoto na muelekeo wa OMKR. (Angalia kiambatanisho Namba 2)



Aidha, Kupitia fedha za misaada ya kijamii zinazotolewa na Mhe. Waziri, Skuli ya Sekondari ya Biashara - Mombasa, kikundi cha Kipwida cha Maungani na Skuli ya Maandalizi ya Kiislam ya Magomeni vimepatiwa msaada wa fedha taslim ili kuvisaidia katika shughuli zao za kujiendeleza.

30. **Mheshimiwa Spika**, wafanyakazi wawili walinzi wamelipwa posho la baada ya saa za kazi, huduma za viburudishaji kwa wageni na vikao rasmi zimetolewa. Wafanyakazi wanane (wanawake 2 na wanaume 6) waajiriwa wapya wamepatiwa mafunzo ya "Orientation" katika Chuo Cha Utumishi wa Umma. Wafanyakazi 7 (mwanamke 1 na wanaume 6) wamepatiwa mafunzo ya muda mfupi na 20 (wanawake 10 na wanaume 10) wamepatiwa mafunzo ya muda mrefu katika ngazi ya cheti, diploma, shahada ya kwanza na ya pili katika fani mbali mbali (Angalia kiambatanisho namba 3)
31. **Mheshimiwa Spika**, mpango wa manunuzi (*Procurement Plan*) wa vifaa mbali mbali kwa ajili ya matumizi ya OMKR umetayarishwa na kuratibiwa ipasavyo kwa kufuata taratibu za manunuzi. Vikao vya Kamati tendaji vimefanyika na viwili vya Kamati ya Uongozi vilifanyika na kujadili mambo mbali mbali kama miongozo ya kazi inavyoelekeza. Kupitia vikao hivi, watendaji wa OMKR walipata nafasi ya kupeana maelekezo na kubadilishana uzoefu wa majukumu yao.
32. **Mheshimiwa Mwenyekiti**, Idara ya Uendeshaji na Utumishi kwa mwaka wa Fedha 2013/2014 imekadiria kutumia jumla ya TZS 292,827,000/= kwa matumizi mengineyo. Hadi kufikia Machi 2014, Idara ilikwisha kuingiziwa TZS 157,648,182/= sawa na Asilimia 54 (Rejea kiambatanisho namba 1)

## **IDARA YA MAZINGIRA**

33. **Mheshimiwa Spika**, Idara hii ina jukumu la kukusanya na kuhifadhi taarifa za kimazingira, kutoa taarifa za kimazingira ili ziweze kusaidia katika kutayarisha na kutekeleza mipango na miradi ya maendeleo, kufuatilia mwenendo wa hali ya kimazingira, kukabiliana na matatizo ya kimazingira, kuhamasisha wadau kuchukua hatua za kuhifadhi mazingira pamoja na kutoa elimu ya mazingira kwa jamii.

Kwa mwaka wa fedha 2013/2014, Idara ya Mazingira ilipanga kutekeleza malengo yafuatayo:

1. Kuimarisha usimamizi wa udhibiti wa uchafuzi wa mazingira.
2. Kuimarisha usimamizi endelevu wa maliasili.
3. Kuimarisha na kusimamia utekelezaji wa Mikakati, Sera, Sheria na Kanuni.
4. Kukuza uelewa wa elimu ya mazingira kwa jamii na wadau wengine wa Mazingira
5. Kusimamia uingizwaji wa masuala ya mazingira katika miradi ya maendeleo.
6. Kuimarisha mazingira ya kazi na maslahi ya wafanyakazi

**34. Mheshimiwa Spika,** hadi kufikia Machi 2014 Idara imeweza kutekeleza yafuatayo katika malengo iliyopanga:

**35. Mheshimiwa Spika,** operesheni 115 (75 UNG, 40 PBA) za mifuko ya plastiki kwa ajili ya kudhibiti uchafuzi wa mazingira zimefanyika na watu 18 (3 UNG 15 PBA) wamekamatwa na kuhukumiwa kwa faini ya jumla ya shilingi 3,290,000/=. Mifuko yenye uzito wa kilo 978 imekamatwa na imeangamizwa. Vile vile operesheni 26 zinazohusu uchukuaji ovyo wa maliasili zisizorejesheka zimefanyika. Wahusika wamefikishwa katika vyombo husika na kupigwa faini ya fedha taslim na kuonywa. (Angalia kiambatanisho namba 4: Operesheni za maliasili zisizorejesheka).

**36. Mheshimiwa Spika,** mapitio ya Sheria ya Mazingira yamefanyika kwa kuwashirikisha wadau mbali mbali miongoni mwao ni Wajumbe wa Kamati ya Kudumu ya BLW ya Kusimamia Ofisi za Viongozi Wakuu wa Kitaifa. Aidha, rasimu ya Mswada wa Sheria ya Usimamizi wa Mazingira hivi karibuni imewasilishwa kwenye kikao cha Kamati ya Makatibu Wakuu. Michango iliyotolewa na wajumbe wa kamati hiyo inaendelea kufanyiwa kazi.

**37. Mheshimiwa Spika,** kwa ajili ya kukuza uelewa wa elimu ya mazingira, jumla ya vipindi 6 vya redio na vipindi 6 vya TV vimerushwa kupitia ZBC redio na TV, slogan 2 za Redio na Slogan 2 za TV zimetayarishwa, semina ya MKUHUMI kwa Waheshimiwa Wakuu wa Mikoa, Wilaya, Maofisa

Tawala wa Mikoa, Wilaya, Madiwani na Masheha wa maeneo yenye misitu ya hifadhi ya jamii imefanyika.

38. **Mheshimiwa Spika**, jumla ya miradi 20 imefanyiwa ufuatiliaji na kutolewa ushauri wa kimazingira na miradi 17 imepewa vyeti vya tathmini ya athari za kimazingira na hivyo kutakiwa kuanza kazi za utekezaji.
39. **Mheshimiwa Spika**, Idara imeshiriki katika mikutano na makongamano katika ngazi ya kitaifa, kikanda na kimataifa. Ushiriki huo umesaidia katika kuleta maelewano zaidi na washirika wa maendeleo na wataalamu mbali mbali pamoja na kuona fursa zilizopo.
40. **Mheshimiwa Spika**, Idara ya Mazingira kwa mwaka wa fedha 2013/2014 ilikadiriwa kutumia TZS 127,884,000/kwa kuendeshea kazi, hadi kufikia Machi 2014 ilikwisha ingiziwa TZS 55,750,570/= sawa na asilimia 44 (Rejea kiambatanisho namba 1)
41. **Mheshimiwa Spika**, kwa kipindi cha mwaka 2013/14 OMKR ilikadiriwa kukusanya TZS 10, 500,000/- kupitia Idara ya Mazingira. Fedha hizi zinatokana na ada ya hifadhi ya mazingira ikiwa ni pamoja na vyeti vya Mazingira. Kazi ambayo inategemea idadi ya miradi inayowasilishwa kutoka ZIPA au miradi ya maendeleo ambayo inastahili kufanyiwa tathmini. Hadi kufikia Machi 2014, jumla ya TZS 5, 418,000/= ambazo ni sawa na asilimia 52 ya lengo zilikusanywa.

## **IDARA YA WATU WENYE ULEMAVU**

42. **Mheshimiwa Spika**, Idara hii ina jukumu ya kuratibu, kusimamia na kufuatilia masuala mbali mbali yanayohusu Watu wenye Ulemavu ili kuhakikisha ujumuishwaji katika shughuli zote za kimaendeleo zikiwemo za kiuchumi na kijamii. .

Kwa mwaka wa fedha 2013/2014, Idara ya Watu wenye Ulemavu ilipanga kutekeleza malengo yafuatayo:

1. Kuimarisha mazingira ya utendaji kazi.
2. Kutengeneza mfumo wa takwimu (*data base*) za Watu wenye Ulemavu.

3. Kusimamia haki, fursa sawa na ujumuishwaji wa Watu wenye Ulemavu.
43. **Mheshimiwa Spika**, hadi kufikia Machi 2014, Idara ya Watu wenye Ulemavu imeweza kutekeleza yafuatayo katika malengo iliyopanga:
44. **Mheshimiwa Spika**, vikao vitatu vya Baraza la Taifa la Watu wenye Ulemavu vilifanyika na kujadili taarifa mbali mbali zinazohusiana na maendeleo na changamoto zinazowakabili watu wenye ulemavu. Vile vile, vikao viwili vya Maafisa Waratibu wa masuala ya Watu wenye Ulemavu vilifanyika, kupitia vikao hivi utekelezaji wa masuala ya watu wenye ulemavu wa sekta mbalimbali ulijadiliwa. Jumuiya sita za Watu wenye Ulemavu zimepatiwa Ruzuku ya TZS 1,800,000/= kila mmoja. (JUWAUZA, CHAVIZA, ZACDID, UWZ, ZANAB na SOZ) ili kuzisaidia jumuiya hizo katika kutekeleza majukumu yake.
45. **Mheshimiwa Spika**, kama inavyoeleweka kwamba, kila mwaka tarehe 3 Disemba huwa ni siku ya Kimataifa ya Watu wenye Ulemavu Duniani. Kwa upande wa Zanzibar, maadhimisho ya siku hiyo yalifanyika Dole, Wilaya ya Magharibi Unguja ambapo ujumbe wa mwaka 2013 ni "Ondoa vikwazo, weka fursa ili kuwa na jamii jumuishi kwa wote". Kupitia siku hii, shughuli mbali mbali zikiwemo michezo, ngoma za asili pamoja na shughuli nyengine zinazoonesha maendeleo na changamoto za watu wenye ulemavu zilifanyika.
46. **Mheshimiwa Spika**, Idara imefanya tathmini ya awali ya kutambua mahitaji ya vikundi vya ujasiriamali vya Watu wenye Ulemavu pamoja na matumizi ya ruzuku kwa jumuiya za Watu wenye Ulemavu. Pia kwa kushirikiana na "*SAVE THE CHILDREN INTERNATIONAL*", Idara ilifanya uhamasishaji juu ya haki na hifadhi ya mtoto mwenye ulemavu katika mabaraza ya watoto, madrasa, nyumba za kulelea watoto pamoja na maskuli Unguja na Pemba. Safari moja ya nje (nchini Marekani) na ziara mbali mbali za ndani zimefanyika. Safari hizi zimepelekea kukuza mashirikiano na nchi nyengine zinazotekeleza programu zinazohusu watu wenye ulemavu.
47. **Mheshimiwa Spika**, Idara ya Watu wenye Ulemavu kwa mwaka wa fedha 2013/2014 ilikadiriwa kutumia TZS 396,782,000/= kwa kuendeshea kazi, hadi kufikia Machi 2014 ilikwisha ingiziwa TZS 48,010,267/= sawa

na asilimia 12. Kati ya fedha hizo TZS 220,000,000/= sawa na asilimia 56 ya bajeti yote ya Idara ni kwa ajili ya kununua visaidizi ambapo kwa mwaka huu shughuli hio haikufanyika. (Rejea kiambatanisho namba 1)

## **OFISI KUU PEMBA**

**48. Mheshimiwa Spika,** Ofisi hii ina jukumu la kuratibu, kusimamia na kufuatilia utekelezaji wa shughuli zote za Ofisi ya Makamu wa Kwanza wa Rais kwa upande wa Pemba.

Kwa mwaka wa fedha 2013/2014, Ofisi Kuu Pemba ilipanga kutekeleza malengo yafuatayo:-

1. Kuwajengea uwezo wafanyakazi na kuwapatia maslahi.
2. Kuimarisha mazingira ya utendaji kazi.
3. Kuratibu na kusimamia utekelezaji wa shughuli za OMKR Pemba.
4. Kukuza na kuimarisha mawasiliano ya habari

**49. Mheshimiwa Spika,** hadi kufikia Machi 2014 Ofisi Kuu Pemba imeweza kutekeleza yafuatayo:

**50. Mheshimiwa Spika,** katika jitihada za kuimarisha ufanisi wa kiutendaji na majukumu, Ofisi imeajiri wafanyakazi 4 (wanawake 3, mwanamme1) kujaza nafasi za msingi katika Ofisi ya Faragha, wafanyakazi hao wote wamepatiwa mafunzo ya awali ili kuhakikisha ufanisi unapatikana. Aidha, mfanyakazi mmoja anaesoma mafunzo ya Rasilimali watu ngazi ya stashahada (Diploma) katika chuo cha Dar es salaam "*College of Hotel and Business studies*" tawi la Pemba amelipiwa ada ya mafunzo.

**51. Mheshimiwa Spika,** katika kuimarisha mazingira ya utendaji kazi, Ofisi ya Makamu wa Kwanza wa Rais Pemba ilifanikiwa kununua vifaa mbali mbali kwa ajili ya matumizi ya ofisi. Aidha huduma stahiki kwa wafanyakazi mbali mbali kama vile posho la likizo, malipo baada ya saa za kazi na posho la kujikimu zimetolewa. Aidha, matengenezo madogo madogo ya sehemu za Ofisi yamefanyika.

**52. Mheshimiwa Spika,** katika kuratibu shughuli za Ofisi ya Makamu wa kwanza wa Rais Pemba, jumla ya ziara 7 za Mhe. Makamu wa

Kwanza wa Rais zimeratibiwa. Huduma ya ulinzi katika nyumba ya Makamu wa Kwanza wa Rais zimeimarishwa.

- 53. Mheshimiwa Spika,** katika utekelezaji na ufuatiliaji wa shughuli mbali mbali za Ofisi ya Makamu wa Kwanza wa Rais Pemba, elimu na ushauri nasaha kuhusu athari za dawa za kulevya ilitolewa kwa skuli tisa na nyumba 6 za kurekebisha tabia yaani “*sober house*”. Jumla ya wanafunzi 814 (wanawake 441, wanaume 373) na walimu 36 (wanawake 8, wanaume 28) walifaidika na elimu hiyo. Ofisi pia ilifanya uhakiki wa njia za matumizi ya dawa za kulevya. Vikundi 6 vya ushirika na ujasiriamali vya watu wenye ulemavu vilitembelewa ili kuona namna gani vikundi hivyo vinafanya kazi zake. Pia mikutano 2 ya kuwahamasisha wazazi wenye watoto wenye ulemavu kuwapeleka skuli ilifanyika.
- 54. Mheshimiwa Spika,** ili kupunguza athari za uharibifu wa mazingira, usimamizi na ufuatiliaji wa hatua za ufukiaji katika maeneo 8 yalioathirika na uchimbaji wa udongo, mawe na kifusi wakati wa ujenzi wa barabara za Kaskazini Pemba umefanyika. Aidha, ukaguzi wa eneo la uchimbaji matofali uwandani kwa ajili ya kufuatilia maendeleo ya ukuaji wa miti iliyopandwa umefanyika. Maeneo mengine yakiwemo hoteli yamekaguliwa ili kuona kwa namna gani utekelezaji wa masharti ya kimazingira unafuatwa.
- 55. Mheshimiwa Spika,** Ofisi Kuu Pemba kwa mwaka wa fedha 2013/14 ilikadiriwa kutumia TZS 167,575,000/= kwa kuendeshea kazi, hadi kufikia Machi 2014 ilikwisha ingiziwa TZS 72,500,000/= sawa na asilimia 43. (Rejea kiambatanisho namba 1)

## **TUME YA KURATIBU NA UDHIBITI WA DAWA ZA KULEVYA**

- 56. Mheshimiwa Spika,** Tume hii inajukumu la kuratibu mapambano dhidi ya biashara, matumizi, uingizwaji na usafirishaji wa dawa za kulevya Zanzibar. Tume pia inajukumu la kutoa taaluma kwa jamii pamoja na kutoa huduma za tiba na ushauri nasaha kwa watumiaji wa dawa za kulevya.

Kwa mwaka wa Fedha 2013/2014, Tume ya Kuratibu na Udhhibiti wa Dawa za Kulevya ilipanga kutekeleza malengo yafuatayo:-

1. Kupunguza matumizi ya Dawa za Kulevya.
  2. Kupunguza usafirishaji, uzalishaji na usambazaji wa Dawa za Kulevya
  3. Kuweka mazingira bora ya kazi na kuleta ufanisi katika mapambano dhidi ya dawa za kulevya.
- 57. Mheshimiwa Spika,** hadi kufikia Machi 2014 Tume ya Kuratibu na Udhhibiti wa Dawa za Kulevya imeweza kutekeleza yafuatayo:
- 58. Mheshimiwa Spika,** ili kuhakikisha Sheria ya Dawa ya Kulevya inatekelezeka "*Road Map*" ya utekelezaji wa sheria hiyo imeandaliwa na kuekewa makisio ya fedha zinazohitajika ili kuwarahisishia wadau wanaohusika katika utekelezaji. Aidha, vikao vitatu, viwili vya Tume ya Taifa ya Dawa za Kulevya na kimoja cha kamati ya kitaalamu cha dawa za kulevya vimefanyika. Kupitia vikao hivyo, mambo mbali mbali yenye lengo la kuendeleza mbele vita dhidi ya dawa za kulevya yalijadiliwa.
- 59. Mheshimiwa Spika,** katika kuona kwamba Sheria ya Udhhibiti wa Dawa za Kulevya inatekelezwa ipasavyo, rasimu ya kanuni ya sheria hiyo tayari imeshaandaliwa. Vile vile, juhudi za taasisi zinazohusika na mapambano dhidi ya Dawa za Kulevya pamoja na mashirikiano kutoka kwa raia wema zinaendelea vizuri. Jumla ya watu 23 wamekamatwa kwa makosa ya dawa za Kulevya kati yao (wanaume 22 na mwanamke 1) na kesi 21 ziko mahakamani na upelelezi unaendelea.
- 60. Mheshimiwa Spika,** katika kuhakikisha jamii inapata taarifa sahihi juu ya athari na udhibiti wa dawa za kulevya, vipindi 10 vimerushwa hewani kupitia vyombo mbali mbali vya habari vikiwemo Zenji FM, ZBC, HITS FM na Bomba FM. Aidha filamu fundishi kuhusiana na athari za dawa za kulevya imetayarishwa na inatumika katika programu na vipindi vya kuhamasisha jamii.
- 61. Mheshimiwa Spika,** Tume pia iliandaa ziara katika skuli za Serikali, Binafsi na sehemu za kazi ili kutoa taaluma juu ya dawa za kulevya. Jumla ya wanafunzi 2,857 (wanawake 1,690 na wanaume 1,167) kutoka skuli 31 za Unguja wamepatiwa elimu juu ya athari za Dawa za Kulevya na maambukizi ya virusi vya UKIMWI. (Angalia kiambatanisho namba



5) Ziara za utoaji wa elimu katika shehia mbalimbali za Unguja zimefanyika. Lengo la ziara hizo ilikuwa ni kuonana na kamati za ulinzi shirikishi na Polisi jamii za shehia. Jumla ya shehia 13 za Mkoa wa Mjini Magharibi ambazo zinaonekana kuathirika zaidi na biashara na matumizi ya Dawa za Kulevyo pamoja na kuwa na maongezeko ya uhalifu katika jamii zilifikiwa.

**62. Mheshimiwa Spika,** kwa kutambua na kuthamini mchango wa taasisi zisizo za kiserikali katika mapambano dhidi ya dawa za kulevyo, Tume inaendelea kuzipatia ruzuku nyumba za makaazi ya vijana wanaoacha matumizi ya dawa za kulevyo yaani "Sober Houses" ili kusaidia mahitaji mbali mbali.

**63. Mheshimiwa Spika,** Tume ya Kuratibu na Udhubiti wa Dawa za Kulevyo kwa mwaka wa fedha 2013/2014 ilikadiriwa kutumia TZS 160,117,000/= kwa kuendeshea kazi, hadi kufikia Machi 2014 ilikwisha ingiziwa TZS 40,657,333/= sawa na asilimia 25 (Rejea kiambatanisho namba 1)

## **TUME YA UKIMWI**

**64. Mheshimiwa Spika,** majukumu makuu ya Tume ya UKIMWI ni kuhakikisha kwamba sera na mikakati ya taifa ya kupiga vita UKIMWI zinaandaliwa na kutekelezwa, kutafuta rasilimali zitakazotumika katika utekelezaji wa mitiko wa kitaifa wa kupambana na UKIMWI, kuimarisha uwezo wa wadau katika kufanyia kazi programu za UKIMWI na kuratibu shughuli zao, kushajihisha utoaji wa huduma za tiba na matunzo kwa watu walioathirika na kuathiriwa, kufuatilia na kutathmini umakini na ufanisi wa utekelezaji wa mikakati, sera na mitiko wa kitaifa na kutoa taarifa zote zinazohusiana na UKIMWI.

Kwa mwaka wa fedha 2013/2014 Tume ya UKIMWI ilipanga malengo yafuatayo:

1. Kuimarisha mazingira mazuri ya wafanyakazi wa Tume kwa ajili ya kuleta ufanisi katika shughuli za uratibu wa masuala ya UKIMWI.
2. Kuongeza uwezo wa programu za habari, utetezi na mawasiliano ili kuchochea mabadiliko ya tabia katika jamii na makundi maalum.

3. Kuimarisha Uratibu na Utekelezaji wa Sera, Sheria na Mkakati wa Taifa wa Pili wa kupambana na UKIMWI.
  4. Kuongeza utumiaji wa taarifa zinazotokana na Ufuatiliaji, Tathmini na Utafiti katika programu za UKIMWI.
  5. Kusimamia utaratibu wa udhibiti wa matumizi ya fedha.
- 65. Mheshimiwa Spika,** hadi kufikia Machi 2014 Tume ya UKIMWI imeweza kutekeleza yafuatayo:
- 66. Mheshimiwa spika,** katika kuimarisha mazingira mazuri ya kazi na wafanyakazi wa tume ili kuleta ufanisi katika shughuli za uratibu wa masuala ya UKIMWI, wafanyakazi 6 (4, UNG na 2, PBA) wamelipwa stahiki zao ikiwemo likizo, malimbikizo ya mishahara na posho ya kufanya kazi katika mazingira magumu. Wafanyakazi 4 wamelipiwa gharama za masomo. Vile vile, kumalizika kwa ujenzi wa sehemu ya juu ya Jengo la Tume imewezesha kuongezeka kwa nafasi za watendaji. Aidha, vikao vya Bodi ya Tume vimeweza kuimarisha usimamizi na uwajibikaji wa Tume. Sambamba na hayo, huduma mbalimbali zikiwemo ununuzi wa mafuta, ulinzi, umeme na mtandao zimelipiwa kwa kurahisisha ufuatiliaji wa kazi.
- 67. Mheshimiwa Spika,** ili kuhakikisha ufanisi katika kuongeza uwezo wa programu za habari, utetezi na mawasiliano kwa kuchochea mabadiliko ya tabia katika masuala ya UKIMWI, Tume iliendelea kusambaza taarifa za UKIMWI kwa kuchapisha na kusambaza Jarida la Jihadhari nakala 10,000, kalenda 3,000 na pia kurikodi vielelezo vya kufundishia kwa watu wenye ulemavu.
- 68. Mheshimiwa Spika,** kama tunavyofahamu kwamba, kila mwaka ifikapo tarehe 1 Disemba duniani kote huwa tunaadhimisha siku ya UKIMWI duniani. Hapa Zanzibar, maadhimisho ya siku ya UKIMWI duniani yalifanyika, ambapo shughuli za kilele cha maadhimisho hayo zilifanyika katika kijiji cha Paje Wilaya ya Kusini Unguja. Pia, katika mwezi wa Disemba 2013, Sheria ya UKIMWI imepitishwa na Baraza la Wawakilishi.

## **UTEKELEZAJI WA MIRADI YA MAENDELEO**

**69. Mheshimiwa Spika,** katika mwaka 2013/2014 Tume ya UKIMWI ilitekeleza miradi 2 ya maendeleo kwa fedha za Washirika wa Maendeleo. Fedha hizo ni kutoka UNDP na UNFPA kupitia program ya UNDAP. Shughulli zilizotekelezwa kupitia fedha hizo ni kama zifuatazo:

**1. Mradi wa UNDAP kwa ufadhili wa UNDP**

**70. Mheshimiwa Spika,** shughuli za kuratibu muitiko wa taifa wa kupambana na UKIMWI kupitia mikutano ya uratibu baina ya Tume na wadau mbali mbali zimeimarika. Wadau wanaohusika ni kutoka Sekta binafsi (Jumuiya ya Wafanya Biashara (ABCZ), Asasi za Kijamii (CSOs), Makundi Maalum, Kamati za Mawizara, Kamati za Wilaya na Jumuiya ya watu wanaoishi na Virusi vya UKIMWI - ZAPHA+. Pia, uwezo wa Kamati za UKIMWI wa kuingiza masuala ya UKIMWI umeongezeka kwa Wizara 5 kupatiwa mafunzo hayo.

**71. Mheshimiwa Spika,** mapitio ya utekelezaji wa Mkakati wa Pili wa Taifa wa UKIMWI kwa kipindi cha muda wa kati (*Mid Term Review*) yamefanyika kwa lengo la kuimarisha muitiko kwa kipindi kilichobaki cha uhai wa Mkakati (2014 -2016).

**72. Mheshimiwa Spika,** wafanyakazi wanne wa Tume wamewezeshwa kushiriki katika mkutano wa 17 wa UKIMWI uliofanyika Afrika Kusini. Kupitia mkutano huo, Tume iliwasilisha mada mbili kwa njia ya "Posters". Mada hizo zinahusiana na changamoto za kuyafikia makundi maalum na namna ya upatikanaji wa huduma kwa makundi maalum.

**73. Mheshimiwa Spika,** mfumo wa Ufuatiliaji na Tathmini umeendelea kutekelezwa kwa kukusanywa taarifa za watekelezaji na hatimae kutolewa ripoti ya mwaka ya ufuatiliaji. Aidha, taratibu za kufanya utafiti unaowalenga wavuvi kujua kiwango cha maambukizi zinaendelea ili kuwezesha kuandaliwa mipango ambayo msingi wake ni taarifa za kisayansi na za uhakika.

**74. Mheshimiwa Spika,** mfumo wa kupashana na kusambaza habari/taarifa umeimarishwa kwa kununua vifaa vya kuiunganisha Ofisi na Mkonga wa Taifa. Pia, uwezo wa Shehia wa kupambana na unyanyasaji wa kijinsia umeongezwa na kuimarika katika Shehia 27 zilizochaguliwa Unguja na Pemba. Shehia zimejengewa uwezo na kupatiwa stadi zitakazowawezesha

kutumia nyenzo zilizomo ndani ya Shehia zao katika kukabiliana na tatizo hilo na mengine ya kijamii.

## **2. Mradi wa UNDP kwa ufadhili wa UNFPA**

- 75. Mheshimiwa Spika,** tathmini ya tatizo la unyanyasaji wa kijinsia katika maskuli imefanyika. Tume imeisadia Jumuiya ya Maimamu Zanzibar (JUMAZA) kufanya tathmini hiyo ili hatimae kutafuta mbinu muafaka kupunguza tatizo hilo linaloweza kusababisha maambukizi ya VVU Jumla ya skuli 100 za Unguja na Pemba zimehusika.
- 76. Mheshimiwa Spika,** upatikanaji wa huduma za UKIMWI kwa makundi maalum umeongezeka. Huduma za elimu ya UKIMWI, ushauri nasaha na upimaji wa VVU, usambazaji wa kondom na rufaa zimeongezeka kwa wanawake na wanaume. Watu 321 wamepima virusi vya UKIMWI, kondom 5,152 za kiume na 42 za kike zimesambazwa. Uelewa wa masuala ya kinga dhidi ya UKIMWI umeongezeka kwa kusambaza vipeperushi 442 kwa makundi maalum na kufanya mikutano ya elimu 462.
- 77. Mheshimiwa Spika,** elimu ya masuala ya afya ya uzazi imeongezeka kwa wanawake walioacha matumizi ya dawa za kulevya. Hamasa ya wanawake kuacha kutumia dawa za kulevya pia imeongezeka kwa kujiunga na nyumba za kurekebisha tabia. Wanawake 10 wamesaidiwa gharama za kujiunga na nyumba hizo.
- 78. Mheshimiwa Spika,** programu za stadi za maisha zimepanuka kwa kuwafikia vijana 95 wenye ulemavu na kusambaza vielelezo vya kujifunzia vinavyoendana na hali zao. Aidha, Makali ya athari za UKIMWI kwa watu wanaoishi na VVU yamepunguzwa kwa kusaidia vikundi 10 vya uzalishaji na kutoa mafunzo ya ujasiriamali kwa wanawake 35 wanaoishi na VVU ili kunyanyua hali zao za maisha (angalia kiambatanisho namba 6). Vile vile, Utoaji wa elimu ya UKIMWI kupitia sanaa ya maonesho kwa jamii umefanyika katika Shehia 57 (Unguja 37 na Pemba 20) kupitia vikundi vya sanaa vya THESODE na UMATI ambapo watu 4667 (W/ke 2582 na W/me 2082) walifikiwa.

- 79. Mheshimiwa Spika,** Tume ya UKIMWI kwa mwaka wa fedha 2013/14 ilikadiriwa kutumia TZS 502,476,000/= kwa ajili ya matumizi mengineyo. Hadi kufikia Machi 2014, ilikwisha ingiziwa TZS 211,313,500/= sawa na asilimia 42. Aidha Tume ya UKIMWI imepata jumla ya TZS 904,019,050/= kutoka kwa wahisani. (Rejea kiambatanisho namba 1).

## **MUHUTASARI WA MAPATO NA MATUMIZI**

- 80. Mheshimiwa Spika,** katika kipindi cha utekelezaji cha mwaka 2013/14 OMKR ilikadiriwa kutumia TZS 3,020,000,000/= kwa kuendeshea kazi. Kati ya hizo TZS 1,820,400,000/= kwa matumizi mengineyo na TZS 1,199,600,000/= kwa ajili ya mishahara. Hadi kufikia Machi, OMKR ilikwishaingiziwa jumla ya TZS 551,999,910/= kwa matumizi mengineyo ambazo ni sawa na asilimia 30.

Kwa upande wa fedha za miradi ya maendeleo, OMKR ilipanga kutumia TZS 150,000,000/=. Hadi kufikia Machi 2014 ilikwishaingiziwa jumla ya TZS 120,000,000/= ambazo ni sawa na asilimia 80 ikiwa ni mchango wa Serikali. Kwa upande wa fedha za maendeleo kupitia program ya UNDP, OMKR imepokea TZS 471,966,510/= kutoka kwa mashirika ya maendeleo.

Aidha, kwa upande wa Tume ya UKIMWI katika kipindi cha utekelezaji cha 2013/14 ilitarajia kutumia TZS 768,000,000/= kwa kuendeshea kazi. Kati ya hizo TZS 502,476,000/= kwa ajili ya matumizi mengineyo na TZS 265,524,000/= kwa ajili ya mishahara. Hadi kufikia Machi Tume ilikwishaingiziwa jumla ya TZS 211,313,500/= kwa matumizi mengineyo ambazo ni sawa na asilimia 46 Kwa upande wa fedha za washirika wa maendeleo, Tume ya UKIMWI ilipata TZS 355,283,900/= kupitia UNDP/UNFPA na TZS 548,737,150/= kupitia UNDP/UNDP.

## **VIPAUMBELE NA MALENGO YA OFISI YA MAKAMU WA KWANZA WA RAIS KWA MWAKA WA FEDHA 2014/2015**

- 81. Mheshimiwa Spika,** Ofisi ya Makamu wa Kwanza wa Rais kwa mwaka wa Fedha 2014/15 imejipangia vipaumbele vifuatavyo:-

- i. Kujenga uwezo kwa watendaji 20 wa OMKR katika masuala ya utafiti
- ii. Kufanya tafiti tatu katika maeneo ya Mazingira, Watu wenye Ulemavu na Dawa za Kulevya
- iii. Kutayarisha Mfumo wa Ufuatiliaji na Tathmini wa OMKR.
- iv. Kuandaa mpango wa utekelezaji wa Mkakati wa Mabadiliko ya Tabianchi
- v. Kutoa mafunzo ya tathmini za athari za kimazingira kwa wadau 70 kutoa taasisi mbalimbali Zanzibar
- vi. Kuendeleza operesheni 96 za mifuko ya plastiki na 96 za maliasili zisizorejesheka
- vii. Kuandaa mpango wa utekelezaji wa Sera ya Maendeleo ya Watu wenye Ulemavu pamoja na kufanya mapitio ya Sheria Namba 9 ya mwaka 2006
- viii. Kujenga uwezo wa jumuiya 10 za Watu wenye Ulemavu
- ix. Kuandaa mpango wa mawasiliano juu ya sera ya Watu wenye Ulemavu
- x. Kuanzisha programu ya Makuzi ya Awali ya Maendeleo ya Mtoto. (*Early Childhood Development*)
- xi. Kuimarisha mapambano dhidi ya uingizaji wa dawa za kulevya
- xii. Kutoa kinga ya msingi kwa wanajamii ili kuwazuia kuingia katika janga la dawa za kulevya
- xiii. Kutoa tiba kwa walioathirika na dawa za kulevya ikiwemo kujenga kituo cha tiba (Detox) katika eneo la Kidimni
- xiv. Kukamilisha Mapitio ya Sheria No 3 2003 ya kuanzishwa tume ya UKIMWI ambayo itapelekea kuanzishwa kwa mfuko wa fedha kwa ajili ya mapambano dhidi ya UKIMWI (*HIV and AIDS Trust Fund*)

**82. Mheshimiwa Spika,** Ofisi ya Makamu wa Kwanza wa Rais kwa mwaka wa Fedha 2014/15 imepanga kutekeleza malengo yafuatayo kupitia Idara na Tume zake:

## **OFISI YA FARAGHA**

**83. Mheshimiwa Spika,** Ofisi ya Faragha kwa mwaka wa fedha 2014/15 imejipangia kutekeleza malengo 2 yafuatayo:

1. Kusimamia na kuratibu shughuli zote za Makamu wa Kwanza wa Rais.
2. Kuimarisha mazingira ya kazi katika kuleta ufanisi.

**84. Mheshimiwa Spika,** ili Ofisi ya Faragha iweze kutekeleza malengo yake, kwa mwaka wa fedha 2014/2015, naliomba Baraza lako tukufu kuidhinisha jumla ya TZS 411,150,000/= kwa ajili ya kuendeshea kazi.

#### **IDARA YA MIPANGO, SERA NA UTAFITI**

**85. Mheshimiwa Spika,** Idara ya Mipango, Sera na Utafiti kwa mwaka wa fedha 2014/15 imepanga kutekeleza malengo 3 yafuatayo:

1. Kujenga uwezo wa utafiti kwa watendaji 20 na kufanya tafiti tatu katika maeneo ya OMKR (Mazingira, Watu wenye Ulemavu na Dawa za Kulevya)
2. Kuratibu utekelezaji wa masuala mtambuka ya OMKR
3. Kuratibu shughuli za sera mipango na miradi ya maendeleo

**86. Mheshimiwa Spika,** ili Idara ya Mipango, Sera na Utafiti iweze kutekeleza malengo yake, kwa mwaka fedha 2014/2015, naliomba Baraza lako tukufu kuidhinisha jumla ya TZS 146,065,000/= kwa ajili ya kuendeshea kazi. Aidha Idara inaomba idhini ya kutumia Jumla ya TZS 1,400,000,000/= kwa ajili ya kutekeleza mradi mmoja wa maendeleo wa kujenga kituo cha tiba kwa walioathirika na dawa za kulevya na TZS 577,500,000/= kwa ajili ya kutekeleza mradi wa mabadiliko ya tabianchi kupitia fedha za Washirika wa Maendeleo. Idara ya mipango pia inatarajia kupokea fedha TZS 28,000,000/= kupitia mradi wa kujenga uwezo unaoratibiwa na Tume ya Mipango. Fedha hizo zitatumika katika kuandaa Mpango wa Ufuatiliaji na Tathmini wa OMKR.

#### **IDARA YA UENDESHAJI NA UTUMISHI**

**87. Mheshimiwa Spika,** Idara ya Uendeshaji na Utumishi kwa mwaka wa fedha 2014/15 imepanga kutekeleza malengo 2 yafuatayo:

1. Kusimamia, kukuza na kuimarisha mazingira ya utendaji kazi wa OMKR na kuleta ufanisi.



2. Kuwajengea uwezo wafanyakazi na kuwapatia maslahi.

**88. Mheshimiwa Spika,** ili Idara ya Uendeshaji na Utumishi iweze kutekeleza malengo yake, kwa mwaka fedha 2014/2015, naliomba Baraza lako tukufu kuidhinisha jumla ya TZS 1,610,084,000/= kwa ajili ya matumizi ya kawaida, kati ya hizo TZS 320,084,000/= kwa ajili ya kuendeshea kazi na TZS 1,290,100,000/= kwa ajili ya mishahara.

## **IDARA YA MAZINGIRA**

**89. Mheshimiwa Spika,** Idara ya Mazingira kwa mwaka wa fedha 2014/2015 imejipangia kutekeleza malengo 3 yafuatayo:

1. Kuimarisha na kusimamia utekelezaji wa Sera, Sheria na Kanuni za Mazingira
2. Kusimamia uingizwaji wa masuala ya mazingira katika miradi ya maendeleo
3. Kukuza uelewa wa elimu ya mazingira kwa jamii na wadau wengine

**90. Mheshimiwa Spika,** ili Idara ya Mazingira iweze kutekeleza malengo yake, kwa mwaka fedha 2014/2015, naliomba Baraza lako tukufu kuidhinisha jumla ya TZS 113,284,000/= kwa ajili ya kuendeshea kazi

**91. Mheshimiwa Spika,** katika kipindi cha mwaka wa fedha wa 2014/2015, Idara ya Mazingira imepangiwa kukusanya jumla ya TZS 10,500,000/= ambazo zinatokana na ada ya hifadhi ya mazingira ikiwa ni pamoja na vyeti vya mazingira

## **IDARA YA WATU WENYE ULEMAVU**

**92. Mheshimiwa Spika,** Idara ya Watu wenye Ulemavu kwa mwaka wa fedha 2014/15 imepanga kutekeleza malengo 3 yafuatayo:

1. Kuimarisha na kusimamia utekelezaji wa Sheria, Kanuni na Miongozo kwa Watu wenye Ulemavu
2. Kusimamia haki, fursa sawa na ujumuishwaji wa Watu wenye Ulemavu

3. Kuanzisha programu ya Makuzi ya Awali ya Maendeleo ya Mtoto (*Early Childhood Development*)

**93. Mheshimiwa Spika,** ili Idara ya Watu wenye Ulemavu iweze kutekeleza malengo yake, kwa mwaka fedha 2014/2015, naliomba Baraza lako tukufu kuidhinisha jumla ya TZS 278,442,000/= wa ajili ya kuendeshea kazi.

#### **OFISI KUU PEMBA**

**94. Mheshimiwa Spika,** Ofisi Kuu Pemba kwa mwaka wa fedha 2014/15 imepanga kutekeleza malengo 4 yafuatayo:

1. Kuwajengea uwezo wafanyakazi na kuwapatia maslahi.
2. Kuimarisha mazingira ya utendaji kazi.
3. Kuratibu na kusimamia utekelezaji wa shughuli za OMKR Pemba.
4. Kukuza na kuimarisha mawasiliano ya habari

**95. Mheshimiwa Spika,** ili Ofisi ya Makamu wa Kwanza wa Rais Pemba iweze kutekeleza majukumu iliyopanga kwa mwaka wa fedha 2014/2015, naliomba Baraza lako Tukufu liidhinishhe jumla ya TZS 369,575,000/= kwa matumizi mengineyo. Kati ya hizo TZS 159,575,000/= kwa kuendeshea kazi na TZS 210,000,000/= kwa ajili ya malipo ya mishahara.

#### **TUME YA KURATIBU NA UDHIBITI WA DAWA ZA KULEVYA**

**96. Mheshimiwa Spika,** Tume ya Kuratibu na Udhhibiti wa Dawa za Kulevya kwa mwaka wa fedha 2013/14 imepanga kutekeleza malengo 3 yafuatayo:

1. Kupunguza matumizi ya Dawa za Kulevya.
2. Kupunguza usafirishaji na usambazaji wa Dawa za Kulevya
3. Kuweka mazingira bora ya kazi na kuleta ufanisi katika mapambano dhidi ya dawa za kulevya.

**97. Mheshimiwa Spika,** ili Tume ya Kuratibu na Udhhibiti wa Dawa za Kulevya iweze kutekeleza malengo iliyopanga kwa mwaka wa fedha 2014/2015, naliomba Baraza lako liidhinishhe jumla ya TZS 324,000,000/=

kwa kazi za kawaida. Kati ya hizo TZS 220,000,000/= kwa kuendeshea kazi na TZS 144,000,000/= kwa ajili ya malipo ya mishahara.

## **TUME YA UKIMWI**

**98. Mheshimiwa Spika,** Tume ya UKIMWI kwa mwaka wa fedha 2014/15 imepanga kutekeleza malengo 4 yafuatayo:

1. Kuongoza, kuratibu na kusimamia utekelezaji wa Sera, Sheria na Mkakati wa Pili wa Kitaifa wa UKIMWI kwa wadau wote.
2. Kuimarisha ubora wa taarifa zinazokusanywa pamoja na kufuatilia matumizi ya taarifa zinazotokana na ufuatiliaji, tathmini na utafiti wa programu za UKIMWI.
3. Kutoa miongozo na kuratibu masuala ya habari, utetezi na mawasiliano kuhusu UKIMWI ili kuchochea mabadiliko ya tabia katika jamii na makundi maalum.
4. Kuongoza pamoja na kuimarisha mazingira mazuri ya kazi na wafanyakazi wa Tume kwa ajili ya kuleta ufanisi katika shughuli za uratibu wa masuala ya UKIMWI.

**99. Mheshimiwa Spika,** ili Tume ya UKIMWI iweze kutekeleza malengo iliyopanga kwa mwaka wa fedha 2014/2015, naliomba Baraza lako liidhinishhe jumla ya TZS 811,000,000/= kwa kazi za kawaida. Kati ya hizo TZS 533,208,700/= ni kwa ajili ya kuendeshea kazi na TZS 277,791,300/= kwa ajili ya mishahara. Aidha naomba Baraza lako liidhinishhe TZS 50,000,000/= kwa kazi za Maendeleo kupitia SMZ na TZS 1,369,000,000/ kutoka kwa Washirika wa Maendeleo.

**100. Mheshimiwa Spika,** muhtasari wa makisio ya matumizi kwa mwaka 2014/15 kwa OMKR (Angalia kiambatanisho namba 7).

**101. Mheshimiwa Spika,** OMKR pia imelenga shabaha mbalimbali katika kufikia malengo yake iliopanga kutekeleza kwa mwaka wa 2014/15. (Angalia kiambatanisho namba 8).

## **SHUKURANI**

- 102. Mheshimiwa Spika,** napenda kuchukua fursa hii kuzishukuru nchi marafiki, Mashirika ya Kimataifa, pamoja na watu binafsi ambazo zinaendelea kushirikiana na Ofisi ya Makamu wa Kwanza wa Rais katika kutekeleza majukumu yake. Nchi hizo ni pamoja na Marekani, Finland, Norway, Uingereza, Uholanzi, Jamhuri ya Watu wa China, India, Falme za nchi za Kiarabu. Mashirika ya kimataifa yakiwemo UNDP, UNICEF, UNFPA, UNAIDS, UNEP, UNODC, UNESCO, UNIDO, DFID, WHO, World Bank, AIHA, ICAP, Save the Children na nchi na mashirika mengine ambayo sikuyataja lakini kwa njia moja au nyengine yanatuunga mkono katika shughuli zetu za maendeleo. Michango yao tunajali na kuithamini
- 103. Mheshimiwa Spika,** napenda kutoa shukurani za dhati kwa Taasisi mbali mbali za Serikali zikiwemo vyombo vya ulinzi na usalama na taasisi zisizo za kiserikali zinazojishughulisha na masuala ya UKIMWI, mapambano dhidi ya dawa za kulevya, utunzaji na uhifadhi wa mazingira na kutetea haki na fursa za watu wenye ulemavu. Nawaomba waendeleo kutupa mashirikiano na hatimae kufikia lengo kuu la kukuza uchumi na kupunguza umasikini. Aidha, napenda kuwashukuru waandishi wa habari kupitia vyombo vyao vikiwemo Televisheni, Redio na Magazeti ambavyo vimekuwa vikishirikiana nasi katika kuielimisha jamii juu ya shughuli zinazotekelezwa na OMKR
- 104. Mheshimiwa Spika,** napenda kutoa shukurani za pekee kwa Makamu wa Kwanza wa Rais Mheshimiwa Maalim Seif Sharif Hamad, akiwa ndio kiongozi wa Ofisi yetu, kwa maelekezo yake kwangu. Nawashukuru watendaji wote wa Ofisi ya Makamu wa Kwanza wa Rais chini ya uongozi wa Katibu Mkuu Dr. Omar Shajak na Naibu Katibu Mkuu Dr. Islam Salum kwa ushirikiano na ushauri wanaonipa ambao ndio uliowezesha kutekelezwa kwa majukumu ya Ofisi kwa mwaka 2013/2014. Napenda pia kuwashukuru kwa dhati Afisa Mdhamini, wa Ofisi ya Makamu wa Kwanza wa Rais Pemba, Wakurugenzi Watendaji wa Tume na Wakurugenzi wa Idara na Taasisi zilizo chini ya Ofisi ya Makamu wa Kwanza wa Rais pamoja na Watendaji wote kwa kuifanya Ofisi yetu iweze kutekeleza majukumu yake kwa ufanisi mkubwa na kwa kazi kubwa walioifanya katika kuandaa mpango na bajeti hii kwa wakati.

**105. Mheshimiwa Spika,** napenda niwashukuru Waheshimiwa Wajumbe wa Baraza lako Tukufu kwa kuwa wasikivu na wastahamilivu wakati nikiwasilisha hotuba yangu. Nawaomba waendeleo kushirikiana na OMKR katika kutoa ushauri na michango mbali mbali ili kusaidia katika kuleta ufanisi. Aidha nakupongeza wewe binafsi kwa busara zako katika kuliongoza Baraza hili. Ninakuombea wewe pamoja na Waheshimiwa wote kila la kheri, afya njema na mafanikio katika kazi za kila siku. OMKR inaamini kuwa **KWA PAMOJA TUTAWEZA** kudhibiti uharibifu wa mazingira, kupunguza uingiaji na usambazaji wa dawa za kulevya, kuzuia maambukizi mapya ya VVU na kukomesha unyanyasaji wa Watu wenye Ulemavu endapo kila mmoja wetu ataendelea kutimiza wajibu wake.

### HITIMISHO

**106. Mheshimiwa Spika,** kwa heshima nachukuwa nafasi hii kuwaomba Wajumbe wa Baraza lako Tukufu waipokee, wajadili, watushauri, watuelekeze na hatimae kuidhinisha makadirio ya matumizi ya Ofisi ya Makamu wa Kwanza wa Rais kwa mwaka wa fedha 2014/2015 ya jumla ya Shilingi Bilioni mbili, milioni mia tisa ishirini na nane na laki saba (TZS 2,928,700,000/=). Kati ya fedha hizo, Shilingi Bilioni moja milioni mia nne ishirini na nane na laki sita (TZS 1,428,600,000/=) kwa matumizi mengineyo na Shilingi Bilioni moja, milioni mia tano na laki moja (TZS 1,500,100,000/=) kwa ajili ya mishahara. Aidha naliomba Baraza lako Tukufu kuidhinisha jumla ya Shilingi Bilioni moja, milioni mia nne (TZS 1,400,000,000/=) kwa kazi za maendeleo ikiwa ni mchango wa Serikali na 577,500,000/= ikiwa ni mchango wa Washirika wa Maendeleo.

**107. Mheshimiwa Spika,** naliomba pia Baraza lako tukufu liidhinishie Tume ya Kuratibu na Udhhibiti wa Dawa za Kulevya matumizi ya TZS 364,000,000/= kwa kazi za kawaida, ambapo TZS 220,000,000/= kwa matumizi mengineyo na TZS 144,000,000/= kwa ajili ya mishahara.

**108. Mheshimiwa Spika,** naliomba Baraza lako tukufu liidhinishie Tume ya UKIMWI matumizi ya TZS 811,000,000/= kwa kuendesha kazi, ambapo kati ya hizo TZS 533,208,700/= kwa ajili ya matumizi mengineyo na TZS 277,791,300/= kwa ajili ya mishahara. Aidha,

naliomba Baraza lako tukufu kuidhinisha jumla ya TZS 50,000,000/= kwa kazi za maendeleo ikiwa ni mchango wa Serikali na TZS 1,369,000,000/= ikiwa ni mchango wa Washirika wa Maendeleo..

Aidha naliomba Baraza lako Tukufu likubali mchango wa jumla ya TZS 10,500,000/= ikiwa ni mapato yaliokadiriwa kukusanywa kwa mwaka wa fedha 2014/2015 na Ofisi ya Makamu wa Kwanza wa Rais.

**Mheshishimwa Spika,** naomba kutoa hoja